

Na, kua kiia i runga ake nei nuku atu i te ono miriona pauna e pau ana i nga rerewe i te tau, otira e ea tonu ana tena moni i nga hua o nga rerewe, a toe mai hoki tetahi wahi moni hei whakaea i tetahi wahi o te itarete o nga moni i moketitia i mua ra hei hanga i aua rerewe. Waihoki ko nga poutapeta me nga waea, nuku atu i te rua miriona pauna e pau ana i ena i te tau. Na, e ea tonu ana i nga moni hua o tena tari ona raruraru katoa, a toe mai hoki tetahi wahi.

Ko te Tari o nga Pane-kingi tetahi o nga tino tari mahi moni a te Kawanatanga, haunga ia nga pane-kiingi mo nga reta me nga poutapeta. Ki te utua mai tetahi moni ki a koe, ko te nui o taua moni kei te rua pauna ka ahu atu, e ki ana te ture me whakamau e koe ki runga ki te rehiiti te pane, e rua kapa. Me whakaaro noa e hia nga rehiiti pena kei te tuhia i ia ra, i ia ra o te tau. Na, ko nga kirimina, ko nga pukapuka mokete, ko nga pukapuka hoko, rihihi, tuku whenua ranei, ko nga pukapuka whakaoti hei whakatutuki i nga tikanga maha o te ture, kei te kiia mai e te ture, e kore era hanga e whaimana me rehitara, ki ona tari rehitara, na i te rehitatanga ka tangohia atu e te Kawanatanga he takoha. E whai ana tenei hanga te takoha i nga tikanga nunui hei painga mona. i runga i nga kai e ora ai te tangata ora, kei t ora hoki ia hei whakaae. ae e tika ana, kia tangohia he wahi ma te Kawanatanga, e mahi nei i nga rawa a te tangata ora. i nga rawa a te tupapaku. Engari kainga ana e ia, i runga hoki i ana rawa. Tena ko te tupapaku he aha hoki i whaia ai ki te poka ra ano? E marama ana ra, ko te tupapaku anake i haere. ko ana rawa i mahue i te ao nei. Na, ka tirohia e nga tangata whai whakaaro, ka waimarie noa etahi atu tangata i nga rawa a te tangata kua mate ra, nana nei era rawa i mahi, i whakaemi, a ka whiwhi ko nga tangata kihei nei i pa atu ki nga mahi, nana i hua mai ai aua rawa. Ka whakaarohia, kaati me pa atu ano te Iwi Nui ki aua rawa a te tupapaku, ara, ko te tinana o te Iwi Nui ko te Kawanatanga. Na, ka kiia e te ture, e kore e ahei kia tau aua rawa ki nga tamariki, ki nga whanaunga ranei o te tupapaku, me matua utu ra ano e ratau te wahi ma te Kawanatanga o te wariu o nga rawa a te tupapaku.

I tua ake i ena huarahi moni a te Kawanatanga, ko te hanga nei ko te taake, ko te taake i te whenua, ko te take i nga moni hua, i nga moni puta a tau ki nga tangata. Ko te tino kaupapa ia o te taake whenua, hei whakahihiri i te tangata ki te whakapai i te whenua, kia ea ai i nga hua o te whenua ona taimahatanga. Ko tetahi kaupapa o te taake whenua, he whakawehi i te tangata kei apo nui i te whenua: ko te akiaki ranei i nga tangata nui te whenua, kia roherohe i etahi wahi, ka tuku atu ma nga mea whenua kore. Na, ko te taake i runga i nga moni wiini, i nga moni puta-a-tau (income-tax) e toronga ana mai ki nga tangata whai rawa. Inahoki ra kia huri atu ki tua o te £300 te rahi o taua moni puta-a-tau, katahi ka eke ai te taake. A, ka ata kapea ano e te ture tetahi wahi kia kore takoha, ara, te wahi